

## Ri carta xutz'ibaj ri Pablo che riglesia c'o Galacia

*Ri Pablo cuya pan rutzil quiwach ri hermanos e c'o Galacia*

<sup>1</sup> Ri'in in Pablo, in utako'n ri Dios. Na e ta c'u juna ticawex takayom lo we, na e ta juna achi cojoyom we; ma e ri Kanimajawal Jesucristo y e ri Kakaw Dios, ri Jun xuc'astajisaj lo Ruc'ajol chiquixo'l ri ecaminak.

<sup>2</sup> Junam c'u cuc' conoje ri hermanos e c'o wara wuc', cantz'ibaj pan wa carta chique riglesias e c'o che ri luwar re Galacia.

<sup>3</sup> C'ulu c'u alak ri unimal rutzil c'u'xaj y ri utzil chomal re ri Kakaw Dios y re ri Kanimajawal Jesucristo,

<sup>4</sup> ri xuya rib pa camic rumá ri kamac. Xu'an wa' ma e xraj ri' ri Kakaw Dios che cha' jela' cojresaj lo che ronoje ri na utz taj caqui'an ri winak chupa tak wa k'ij oj c'o wi.

<sup>5</sup> Kayaca c'u uk'ij ri Kakaw Dios wak'ij ora y chikawach apanok na jinta chi utakexic. Amén.

*Xa jun ri Utzilaj Tzij re ri Dios*

<sup>6</sup> E ri'in lic cacam wanima' che ma na jampatana xya can alak ri Dios, ri xusiq'uij alak rumá ri unimal rutzil uc'u'x ri Cristo, yey ec'u wo'ora e takem alak jun c'utunic junwi chwa ri Utzilaj Tzij re ri Cristo.

<sup>7</sup> Wa' na e ta que'elawi c'o juna chic Utzilaj Tzij puwi ri Cristo. Pero e c'o jujun xa caquisachisaj

na'oj alak y e cacaj caquijalc'atij ri Utzilaj Tzij re ri Cristo.

<sup>8</sup> Tob ne junok chike ri'oj o juna ángel re chila' chicaj cutzijoj juna chic c'utunic che alak junwi chwa ri Utzilaj Tzij katzijom chi ri'oj che alak, peta c'u ri' ri k'atbal tzij re ri Dios puwi!.

<sup>9</sup> Jela' pacha' ri nubi'im lok, cambi'ij tanchi wo'ora: We c'o junok cutzijoj juna chic c'utunic junwi chwa ri Utzilaj Tzij tom chi alak, peta c'u ri' ri k'atbal tzij re ri Dios puwi!.

<sup>10</sup> ¿E neba cantzucuj ri'in ri yacbal nuk'ij chiquiwach ri ticawex o e cuaj can'an janipa ri caraj ri Dios? ¿E neba cuaj ri'in quinel chi utz chiquiwach ri ticawex? We ta ri'in xa e cantzucuj ri cayac nuk'ij cuma ri ticawex, ri' na in ta sakil aj chac re ri Cristo.

### *Ri Utzilaj Tzij xtzijox ruma ri Pablo*

<sup>11</sup> Cheta'maj c'u alak hermanos: Ri Utzilaj Tzij cantzijoj ri'in na xa ta uch'a'tem juna achi,

<sup>12</sup> na e ta juna achi xya'w chwe y na che tane juna achi xinmaj wi wa'; ma e ri Kanimajawal Jesucristo xk'alajisan chwe.

<sup>13</sup> Tom chi c'u alak puwi ri nubinic nusilabic ojertan echiri' nutakem tak ri cojobal que raj judi'ab; ruc' c'ax xebenuternabej rutinamit ri Dios ri quicojom rubi' ri Cristo y lic xintij uk'ij cansach quiwach conoje.

<sup>14</sup> Chiquixo'l ri wachbi'il junam oj q'uiyinak lok, in ri lic xinya wib che utakexic tak ri cojobal que can ri katí'-kamam ri oj aj judi'ab.

<sup>15</sup> Na ruc' ta c'u ri', ri Dios xinucha' lo ri'in echiri' c'amaja' ne quinalaxic, xinusiq'uij ruma ri unimal rutzil uc'u'x

**16** y xuk'alajisaj uwach Ruc'ajol chwe cha' e cantzijoj ri Utzilaj Tzij chique ri na e ta aj Israel. Yey puwi wa' na xintz'onoj tane nuna'oj che juna ticawex.

**17** Na xin'ec tane Jerusalem re quebe'nuwila ri ebu'anom tako'n nabe chinuwa ri'in. Ri xin'ano, e xin'ec Arabia y c'a tec'uchiri' xintzelej tanchi Damasco.

**18** Xic'ow na c'u oxib junab echiri' xintzelej Jerusalem re canweta'maj uwach ri Pedro y xinc'oji' chila' ruc' wo'lajuj k'ij.

**19** Yey na xinwil ta quiwach ri jujun chic e tako'n; xew xinwil uwach ri Jacobo, ruchak' ri Kanimajawal.

**20** Chwach c'u ri Dios cambi'ij che alak: Wa cantz'ibaj pan che alak lic katzij, na rak'ubal taj.

**21** Tec'uchiri' xin'ec tanchi che tak ri luwar re Siria y re Cilicia.

**22** Chupa tak la' la k'ij, ri hermanos re riglesias e c'o Judea c'amaja' ne caqueta'maj nuwach ri'in,

**23** xew quitom cabi'xic: «E rachi xojuternabej ruc' c'ax rumá kacojom rubi' ri Kanimajawal, wo'ora catajin che utzioxic ri Utzilaj Tzij, yey e ne rire ri lic xraj cusachisaj uwach wa!»

**24** Wuma c'u ri'in ri hermanos e aj Judea lic xquiyyac uk'ij ri Dios.

## 2

*Rie aj wach re riglesia caquita puwiri chac cu'an  
ri Pablo chiquixo'l ri na e taj aj judi'ab*

**1** Xic'ow na c'u cajlajuj junab echiri' xin'ec tanchi Jerusalem ruc' ri Bernabé, yey xinc'am bi ri Tito kuc'.

<sup>2</sup> Xin'ec c'ut, ma ri Dios xuk'alajisaj chwe chirajawaxic quinopon chila'. Xkamol c'u kib xew cuc'ri e aj wach re riglesia y xink'alajisaj chiquiwach ri Utzilaj Tzij cantzijoj chique ri na e ta aj judi'ab. E xin'an wa' cha' janipa ri nu'anom chic y tak ri quintajin che u'anic na casach ta uwach.

<sup>3</sup> Wachbi'il c'u ri Tito ye yire na e ta cuq'uil ri e aj judi'ab; na ruc' ta c'u ri', ri e aj wach re riglesia na xquitak tane che rire cucoj ri retalil re circuncisión.

<sup>4</sup> Xkamol c'u kib cuc' wa e aj wach, ma e c'o jujun na e ta sakil hermanos xquimin quib chikaxo'libal ri'oj cha' e caquic'ac'alej ri kabinic kasilabic ri oj re ri Cristo, ri Jun xojresaj lo chux'e' ri takanic que raj judi'ab. Xqui'an wa' xa re cacaj cojc'oji' paquik'ab rique.

<sup>5</sup> Pero ri'oj na xkatakej ta c'ana ri caquibi'ij cha' jela' na cajalc'ataj ta ri K'ijsak re ri Utzilaj Tzij cojom chi alak.

<sup>6</sup> E tak c'u raj wach re riglesia ri lic c'o quiwach, tob na jinta c'o cu'an chwe ri'in we ri petinak lok c'o quiwach o na jintaj ma chwach ri Dios xa jun kawach; rique na jinta juna c'ac' tzij xquicoj puwi ri nuc'utunic ri'in.

<sup>7</sup> Y na xew ta wa', ma xquimaj usuc' e ri Dios xya'w panuk'ab ri'in rutzijoxic ri Utzilaj Tzij chique ri na e ta aj judi'ab, jela' pacha' xya'i' che ri Pedro rutzijoxic wa' chique ri e aj judi'ab.\*

<sup>8</sup> Ma ri Dios, ri xutak bi ri Pedro re cu'ana utako'n chiquixo'l ri e aj judi'ab, e xtakaw bi

\* <sup>2:7</sup> "Ri e aj judi'ab": Pa ri ch'a'tem griego cubi'ij "ri e re ri circuncisión".

we'in re quinu'ana utako'n chiquixo'l ri na e ta aj judi'ab.

<sup>9</sup> Ec'u ri Jacobo, ri Pedro y ri Juan, ri lic c'o quiwach pa riglesia, xquimaj usuc' e ri Dios ya'yom wa jun chac chwe. Xquiya c'u ri' ri quick'ab chwe ri'in y che ri Bernabé, c'utubal re oj chi cachbi'il rique. Y xuc'ul quic'u'x cojchacun ri'in y ri Bernabé chiquixo'l ri na e ta aj judi'ab, yey rique e quechacun chiquixo'l ri e aj judi'ab.

<sup>10</sup> Xew c'u lic xquitz'onoj chike na quekamesc'utaj ta ri e niba'ib y wa' lic e cacha nuc'u'x che u'anic.

### *Ri Pablo cuch'a'bej upa ri Pedro*

<sup>11</sup> Na ruc' ta c'u ri', echiri' ri Pedro xc'un pa ri tinamit Antioquía, ri'in e la' chiwachil lic co xinch'a'bej upa rumá ri na usuc' taj catajin che u'anic.

<sup>12</sup> Ma ri Pedro xaki cawa' cuc' ri hermanos na e ta aj judi'ab, no'j echiri' xec'un jujun e petinak Jerusalem pa riglesia pa c'o wi ri Jacobo, xresaj rib chiquij ri na e ta aj judi'ab y na xwa'ta chi cuc', ma cuxi'ij rib chiquiwach ri lic queboc il che ri retalil re circuncisión.<sup>†</sup>

<sup>13</sup> Ec'u ri hermanos e aj judi'ab xqui'an que ruc' ri Pedro, yey ri Bernabé xpacha'b ne cuc' wa' wa xa queb quipalaj.

<sup>14</sup> Echiri' ri'in xinwilo na e ta caqui'an jela' pacha' ri cubi'ij ri sakil c'utunic re ri Utzilaj Tzij, jewa' ximbi'ij che ri Pedro chiquiwach conoje ri

---

<sup>†</sup> **2:12** “Ri lic queboc il che ri retalil re circuncisión”: Wa' e jujun aj judi'ab quicojom chi rubi' ri Cristo pero caquibi'ij chirajawaxic chique ri na e ta aj judi'ab caquicoj ri retalil re circuncisión cha' quecolobetajic.

quimolom quib: «Rilal, lal cuq'uil raj judi'ab yej ca'an e la pacha' ri caqui'an ri hermanos na e ta aj judi'ab y na catakej ta chi la jujun che ri takanic que raj judi'ab. ¿Sa' c'u uchac ri' cabi'ij rilal chique ri na e ta aj judi'ab chirajawaxic caquitakej wa takanic que ri e aj judi'ab?»

*Cojcolobetajic ruma ri cubulibal kac'u'x ruc' ri Cristo*

<sup>15</sup> Ri oj aj judi'ab, chwi kalaxic lok, na oj ta aj palajiy tzij pacha' ri jujun chic tinamit na jinta Rutzij Upixab ri Dios cuc'.

<sup>16</sup> Na ruc' ta c'u ri', keta'am na jinta junok cu'an jusuc' che rib ruma cutakej ri takanic que raj judi'ab; ma ri lic chirajawaxic wi e ri cubulibal c'u'xaj ruc' ri Kanimajawal Jesucristo. E uwari'che ri'oj xkacoj rubi' cha' jela' Rire cu'an jusuc' chike xew ruma ri cubulibal kac'u'x ruc' y na ruma ta ri cakatakej juna tzij pixab. Ma na jinta junok cu'an jusuc' che rib ruma cutakej ri takanic que raj judi'ab.

<sup>17</sup> Ec'u ri'oj lic cakaj coju'an jusuc' chwach ri Dios xew ruma ri cubulibal kac'u'x ruc' ri Cristo; yej we chiquiwach c'u jujun chic, oj aj mac ruma na cakatakej ta chi ri quitakanic rique, ¿e nawi que'elok coju'ana aj mac ruma ri cubulibal kac'u'x ruc' ri Cristo? ¡Na e ta ri'!

<sup>18</sup> Ma we canc'osoj tanchi lo uwach ri nuc'akom chubi, ri' e que'elok in jun aj palajiy tzij.

<sup>19</sup> Ri'in xinya wib che u'anic ronoje ri takanic que raj judi'ab cha' jela' can'an jusuc' che wib, pero xinmaj usuc' na ruma ta wa' cu'an jusuc' junok chwach ri Dios; ec'u wo'ora nuya'om wib che ulok'nimaxic ri Dios ruc' ronoje ri nuc'aslem.

<sup>20</sup> Jec'ula', ri nuc'aslemañ na we'in ta chic, ma e re ri Kanimajawal Jesucristo. E pacha' xincam chwa ri cruz junam ruc' ri Cristo. Wo'ora che ri nuc'aslem, ronoje ri can'ano e rumá ri cubulibal nuc'u'x ruc' Ruc'ajol ri Dios, ri lic c'ax xinuna'o y xuya rib pa camic wuma ri'in.

<sup>21</sup> Na cuaj ta c'ut canc'ak bi uk'ij ri unimal rutzil uc'u'x ri Dios; ma we ta c'o junok curiko cu'an jusuc' che rib chwach ri Dios rumá utakem ri tzij pixab, ri' na jinta cutikoj rucamic ri Cristo.

### 3

#### *Cakac'ul ri Ruxlabixel ri Dios rumá xkacoj ri Utzilaj Tzij*

<sup>1</sup> ¡Tok'o' wach alak aj Galacia! Lic co 'anom che ri c'u'x alak. ¿China xsoco'so'n e alak cha' na cacoj ta chi alak ri K'ijsak? Ma lic xk'alajisax chiwach alak sa' que'elawi rucamic ri Kanimajawal Jesucristo chwa ri cruz.

<sup>2</sup> Bi'ij alak wa' chwe: ¿Xc'ul alak ri Ruxlabixel ri Dios rumá xtakej alak ri takanic que raj judi'ab o rumá xta alak ri Utzilaj Tzij y xcubi' c'u'x alak che?

<sup>3</sup> ¿Su'chac lic 'anom co che ri c'u'x alak? Ma ri binic silabic alak chwach ri Dios xjek lo alak rumá ruchuk'ab ri Ruxlabixel ri Dios, yej wo'ora ¿ca'a'j cami alak ri' caq'uisbej alak wa' xa ruc' ri chuk'ab ralak?

<sup>4</sup> ¿Na jinta cami utikom ri' che alak janipa tak ri c'ulum alak rumá ri Ruxlabixel ri Dios? Na cancoj ta c'ana ri'in we wa' na jinta utikom che alak.

<sup>5</sup> Ma echiri' ri Dios cuya ri Ruxlabixel che alak y ruc' ruchuk'ab cu'an nimak tak milagros chixo'l alak, ¿su'anic cu'ano? ¿E nawi rumá takem alak ri

takanic que raj judi'ab o e ruma xta alak ri Utzilaj Tzij y xcubi' c'u'x alak che?

*Ri cubulibal uc'u'x ri Abraham ruc' ri Dios*

<sup>6</sup> Ri Abraham xcubi' uc'u'x ruc' ri Dios\* y ruma c'u' ri' x'ani' jusuc' che.

<sup>7</sup> E uwari'che, chirajawaxic queta'maj alak wa': E janipa ri lic cubul quic'u'x ruc' ri Dios, ri' e ralc'o'al can ri Abraham.

<sup>8</sup> Ruch'a'tem ri Dios xex chi ubi'im wi lo paquiwi ri na e ta aj Israel, we rique cacubi' quic'u'x ruc' ri Dios, quebu'an jusuc'. Ma jawa' ri utzilaj tzij xbi'x lo ojertan che ri Abraham:

Awuma ri'at, ri Dios quebu'an bendecir conoje tak  
ri tinamit che ruwachulew. *Gn. 12:3*

<sup>9</sup> Jec'uri'l'a', conoje ri cacubi' quic'u'x ruc' ri Dios caquic'ul na ri utz cape ruc' Rire, jela' pacha' ri xuc'ul ri Abraham ruma xcubi' uc'u'x ruc'.

<sup>10</sup> Conoje ri quicubam quic'u'x quecolobetaj xa ruma caquitakej u'anic ri tzij pixab, ri' e c'o chi chuxe' ri k'atbal tzij re ri Dios, ma jawa' tz'ibitalic: China c'u ri na cu'an ta janipa ri takanic tz'ibital can chupa ri Tzij Pixab,

ri' c'o chi chuxe' ri k'atbal tzij re ri Dios *Dt. 27:26*  
cacha'.

<sup>11</sup> Cak'alajin c'u ri', na jintu junok cu'an jusuc' che rib chwach ri Dios ruma cutakej ri Tzij Pixab, ma jawa' tz'ibitalic:

Ri e jusuc' chwach ri Dios,  
c'o quic'aslema ruma ri cubulibal quic'u'x ruc'  
Rire  
cacha'. *Hab. 2:4*

\* **3:6** Ri Abraham xucojo ri Dios e cu'ana janipa ri xubi'tisij che.  
*Gn. 15:6*

**12** E junok cuch'ob rakan cacolobetaj ruma cutakej ronoje ri Tzij Pixab, ri' na cubul ta uc'u'x cacolobetaj ruma ri cubulibal uc'u'x ruc' ri Cristo. Yey jenewa' cubi'ij Ruch'a'tem ri Dios:

China ri ca'anaw re ronoje ri cubi'ij ri Tzij Pixab,<sup>†</sup>  
ri' c'o uc'aslemal chwach ri Dios ruma cu'an  
wa'  
**Lv. 18:5**

cacha!.

**13** Ri Cristo xojresaj chuxel' ri k'atbal tzij c'o pakawi' ruma xkapalajij Rutzij Upixab ri Dios; xu'an c'u wa' echiri' xuya rib pakac'axel ri oj aj mac, ma jewa' ri tz'ibital can pa Ruch'a'tem ri Dios:

Chwach ri Dios, itzel uwach junok catzayabax  
chwa juna che!<sup>‡</sup>  
**Dt. 21:23**

**14** E xu'an wa' ri Kanimajawal Jesucristo cha' ri rutzil uc'u'x ri Dios, ri xbi'tisix che ri Abraham, caya'taj na paquiwi ri na e ta aj Israel ruma ri Cristo; y jec'ula' ruma ri cubulibal kac'u'x, konoje cakac'ul ri Ruxlabixel ri Dios bi'tisim chi ulok.

**15** Hermanos, ri u'anom ri Dios canjunimaj ruc' ri caqui'an ri ticawex cha' camaj alak usuc': Echiri' queb achijab caqui'an juna tzij chiquiwach y caquijiquiba' uwach, lic na utz ta c'u ri' we jun chique cutzelej uch'a'tem che ri ubi'im chic o cucoj uwi' ri quijiquibam chic.

**16** Ec'u ri Dios xuya rubi'tisinic che ri Abraham y che can ri Jun ralc'o'al. Rutzij Upixab ri Dios na jetawa' cubi'ij «chique can rawalc'o'al», pacha'

<sup>†</sup> **3:12** Xew ri Kanimajawal Jesucristo xch'ijow u'aniquil ronoje Rutzij Upixab ri Dios.    <sup>‡</sup> **3:13** Wa' e x'an ojertan echiri' cak'at tzij puwi juna aj mac, cacamisaxic y catzayabax chwa juna che'.

e uq'uiyal ticawex, ma jewa' cubi'ij «che can ri Jun awalc'o'al»; wa' que'elawi e ri Cristo.<sup>◊</sup>

**17** Wa quintajin che ubi'xic e wa': Ri Dios xu'an jun tzij ruc' ri Abraham. Xic'ow na c'u cuatrocientos treinta junab c'a echiri' ri Moisés xutz'ibaj can ri takanic re ri Tzij Pixab. Ec'u wa takanic na utz taj cuyoj wa nabe tzij y na cuyoj tane ri xubi'tisij lo ri Dios.

**18** Ma we ta cakac'ul rubi'tisim ri Dios rumá cakatakej ri Tzij Pixab, ri' na e ta rumá ri bi'tisinic xu'an ri Dios; no'j ri xusipaj ri Dios che ri Abraham e rumá ri bi'tisinic u'anom chi che.

### *Ruchac ri Tzij Pixab tz'ibital can rumá ri Moisés*

**19** ¿Sa' c'u ruchac ri' ri Tzij Pixab tz'ibital can rumá ri Moisés? E cha' cuk'alajisaj chique ri ticawex sa' tak ri quimac chwach ri Dios. Y jela' u'anom lok c'a che ruc'unibal ri Jun Alc'o'al bi'tisim lok, wa' e ri Cristo; ma che Rire x'an wi wa' wa bi'tisinic. Ri Tzij Pixab xtzijox cuma ri ángeles che ri Moisés cha' rire cuk'atisaj chiquiwach ri tinamit;

**20** no'j ri Dios echiri' xu'an rubi'tisinic che ri Abraham, na jinta junok xk'atisan ri tzij chiquiwach, ma e Rire xuk'atisaj rutzij che ri Abraham y na xajawax ta c'u junok chic.

**21** E uwari'che, echiri' ri Dios xuya Rutzij Upixab che ri Moisés, ¿e nawi xujalc'atij ri bi'tisinic u'anom chi che ri Abraham? Na e taj. Ma we ta e ri', e ri Tzij Pixab caya'w ri kac'aslemañ chwach ri Dios, y coju'an c'u jusuc' ri' rumá ri cakatakej ri tz'ibital canok. No'j na e ta u'anom ri'.

---

<sup>◊</sup> **3:16** Gn. 12:7

**22** Ma chupa ri Tzij Pixab tz'ibital canok, cak'alajinic konoje ri oj ticawex oj c'o puk'ab ri mac; e uwari'che lic cajawax ri bi'tisinic u'anom lo ri Dios chique ri cacubi' quic'u'x ruc' ri Kanimajawal Jesucristo.

**23** Echiri' c'amaja' cac'un ri Jun cacubi' kac'u'x ruc', e ri Tzij Pixab xojuchajij y xuc'am lo kawach cha' cacubi' kac'u'x ruc' ri Cristo echiri' copon ruk'ijol cak'alajisax ri Utzilaj Tzij chikawach.

**24** Ec'u que'elawi, ri Tzij Pixab tz'ibital can ruma ri Moisés xojuchajij y xuc'ut chike ri cajawasic cakamajo, pacha' chi oj ac'alab; xuk'alajisaj c'u pan ruc'unibal ri Cristo cha' ruma ri cubulibal kac'u'x ruc' Rire, ri Dios cu'an jusuc' chike.

**25** Ec'u wo'ora cubul chi kac'u'x ruc' ri Cristo, jec'ula'na oj jintachi chuxe' ri Tzij Pixab ri xuc'am lo kawach ojertan.

**26** Ma onoje ralak alak chi ralc'o'al ri Dios ruma ri cubulibal c'u'x alak ruc' ri Kanimajawal Jesucristo.

**27** Onoje c'u ralak ri xc'ul alak ri bautismo chupa rubi' ri Jesús, wo'ora alak chi re ri Cristo y cac'ut c'u alak wa' ruc' ri binic silabic alak.

**28** Xa jun 'anom alak chwach ri Dios, tob jujun che alak e cuq'uil raj judi'ab o na e ta cuq'uil, tob ne jujun che alak e aj chaquib elok'otalic<sup>§</sup> yey jujun chic quechacun pa que rique, tob achi o ixok; ma onoje ralak, xa jun 'anom alak ruma alak c'o puk'ab ri Kanimajawal Jesucristo.

**29** Yey we alak re ri Cristo, ri' alak ralc'o'al ri Abraham yey cac'ul c'u alak ri sipanic ubi'tisim lo

§ **3:28** "E aj chaquib elok'otalic": Quil "esclavo" pa vocabulario.

ri Dios.

## 4

<sup>1</sup> Cambi'ij c'u wa' che alak: Echiri' c'a ch'uti'n ruc'ajol juna beyom, e junam ruc' pacha' juna aj chac pa ja. Tob ne e rire ri rajaw ronoje ri beyomalil, pero wa' c'amaja' cac'oji' puk'ab

<sup>2</sup> ma c'a c'o paquik'ab ri e chajal re y ri caquichacuj rubitak re, copon na ruk'ijol bi'tal can rum a rukaw echiri' quel chuxe' ri takanic que rique.

<sup>3</sup> Jec'ula' kac'ulumam ri'oj ojertan, e pacha' oj ac'alab c'a oj c'o puk'ab ri takanic cojotal che ruwachulew.

<sup>4</sup> No'j echiri' xopon ruk'ijol cha'tal chi lo ruma ri Dios, Rire xutak lo Ruc'ajol, ri xalax ruma jun ixok y xalax chuxe' ri takanic re ri Tzij Pixab tz'ibital can rum a ri Moisés.

<sup>5</sup> Rire xc'unic cha' cojucolobej ri oj c'o chuxe' wa takanic, y jec'ula' coju'ana oj ralc'o'al ri Dios.

<sup>6</sup> E uwari'che, ruma oj chi ralc'o'al ri Dios, Rire xutak lo ri Ruxlabixel Ruc'ajol chupa ri kanima'; y ruma c'u ri Ruxlabixel, utz cakabi'ij che ri Dios: «¡Tat, Lal Nukaw!» cojcha'.

<sup>7</sup> E uwari'che na lal ta chi pacha' jun aj chac c'o puk'ab juna patrón, ma wo'ora lal ralc'o'al ri Dios. Y ruma lal ralc'o'al, Rire cuya na che'la janipa ri ubi'tisim chique ri ralc'o'al.

*Pixabanic chique ri quetzelej tanchi chuxe' ri takanic na re ta ri Dios*

<sup>8</sup> Pakatzij wi, rojertan echiri' na eta'am ta alak uwach ri Dios, ralak e quelok'nimaj alak tak ri tiox, ri lic quewi na e ta dios.

**9** Ec'u wo'ora eta'am chi alak uwach ri Dios, o ri más jusuc' ubi'xiquil e “ralak eta'matal chi wach alak rumá ri Dios”. ¿Sa' c'u ube ri' caya tanchi ib alak chuxé' tak ri takanic na il ta uwach y na jinta uchac?

**10** Ma lic calok'nimaj alak tak ri nimak'ij re ri jujun k'ij, ri jujun ic', ri jujun junab ye ruk'ijol ri jachbal upa tak ri junab.

**11** Lic cubisoj nuc'u'x ma c'axtaj ri chac nu'anom chixo'l alak na jinta cutikoj.

**12** Hermanos, lic cantz'onoj che alak 'ana e alak jela' pacha' ri nu'anom ri'in, ma ri'in jela' xin'ano pacha' ralak.\* Yey echiri' xinc'oji' uc' alak na jinta juna c'ax x'an alak chwe.

**13** Ma eta'am chi alak, echiri' xintzijoj ri Utzilaj Tzij che alak ri nabe laj, xincanaj can uc' alak rumá jun yabil in c'o wi.

**14** Yey na tzel ta xinil alak, na xc'ak tane bi alak nuk'ij tob e la' c'o wa yabil chwe. Ma ri x'an alak e xinc'ul alak, x'an alak chwe pacha' in jun ángel re ri Dios, pacha' chi e xc'ul alak ri Kanimajawal Jesucristo.

**15** ¿Pa c'u xcanaj can wi ri' ri qui'cotemal c'o uc' alak echiri' xinopon chila'? Ma ri xinwil che alak e caya ne anima' alak quesaj ri wach ralak cha' caya alak chwe ri'in.

\* **4:12** Ri Pablo echiri' xucoj rubí' ri Cristo, na xutakej ta chi ri cojobal que raj judí'ab. Yey echiri' rire xopon cuc' ri e c'o Galacia, rique na caquitakej ta ri cojobal que raj judí'ab, ma na e ta aj judí'ab. Pero xebopon jujun c'utunel e petinak Judea y xquic'ut chique chirajawaxic caquicoj ri cojobal que raj judí'ab; y jec'ula' ri e c'o Galacia xquijek caquitakej wa'.

**16** ¿Ruma cami ximbi'ij ri lic katzij che alak, e tzel quinil wi alak ri' wo'ora?

**17** Tak la' la ticawex lic chacojo' lic c'ax caquina' alak tob na e ta caquitzucuj ri utz che alak, ma ri cacaj rique e na cojtakej ta chi alak cha' xew e quetakej alak rique.

**18** Pakatzij wi lic utz we ralak quetakej alak jujun chic, xew tane we rique e caquitzucuj ri lic utz che ralak. Jec'ula' cuaj ca'an ralak wuc' ri'in y na xew ta echiri' in c'o uc' alak.

**19** Ralak pacha' alak walc'o'al, ri'in cantij tanchi c'ax uma ralak jela' pacha' juna ixok echiri' cutzir uwach. Y cantij c'u wa c'ax c'a echiri' ri binic silabic alak cu'ana pacha' ri re ri Cristo.

**20** Lic ne cuaj ta e la' in c'o chila' uc' alak wo'ora yej na lic ta c'ax quinch'aw pawi' alak, ma lic uchapom wanima' ri 'anom alak.

### *Ri c'ambal na'oj chwi rixok Agar y rixok Sara*

**21** Ralak ri ca'aj alak cac'oji' alak chuxe' ri takanic que raj judi'ab, cantz'onoj che alak: ¿Na tom ta néba alak ri ubi'im can ri Moisés chupa ri Tzij Pixab?

**22** Ma tz'ibital canok ri Abraham xec'oji' ca'ib uc'ajol. Jun chique xalax ruc' rixok aj chac pa ja; ri jun chic uc'ajol xalax ruc' ri rixokil. <sup>23</sup>

**23** E ruc'ajol xalax ruc' rixok aj chac pa ja, xalaxic xa ruma quino'jibal rique; no'j ruc'ajol xalax ruc' ri rixokil, e ubi'tisim ri' ri Dios che ri Abraham.

**24** Ec'u wa' e jun c'ambal na'oj. Ri queb ixokib e que'elawi queb tzij; jun e ri petinak che ri juyub Sinaí pa xuya wi ri Dios ri takanic re ri Tzij Pixab.

---

<sup>23</sup> **4:22** Gn. 16:15; 21:1-3

Wa' wi'xok e Agar, yey ri e ralc'o'al rire e ri caquiya quib chuxe' ri takanic que raj judi'ab.

<sup>25</sup> Ec'u ri Agar e cajunimax ruc' ri juyub Sinaí c'o chila' pa ri luwar re Arabia; yey wak'ij ora wa' e ri e aj Jerusalem, ma wa' wa tinamit e c'o chuxe' tak ri takanic que raj judi'ab.

<sup>26</sup> No'j ri "Jerusalem" re chila' chicaj elinak chi chuxe' ri takanic que raj judi'ab yey ri'oj oj ralc'o'al wa' wa tinamit.

<sup>27</sup> Ma jewa' tz'ibital can pa Ruch'a'tem ri Dios:  
¡Chatqui'cot ri'at ixok ri na catalan taj, ri na jinta awalc'o'al!

¡Chatsiq'uin rumá raqui'cotemal, ri'at ri na at ic'owinak ta pa ri c'ax re juna ixok echiri' cutzir uwach!

Ma ri e ralc'o'al rixok xok'otax canok, más queq'uiyar chiquiwach ri e ralc'o'al rixok c'o rachijil

*Is. 54:1*

cacha'.

<sup>28</sup> Hermanos, ri'oj oj jela' pacha' ri Isaac, ma oj sakil ralc'o'al ri Dios rumá ri bi'tisinic xu'an Rire.

<sup>29</sup> Yey pacha' ri xu'an rojertan, ri xalax xa rumá rurayibal rachi e xuternabej ruc' c'ax ri xalax e chirij ri xraj ri Ruxlabixel ri Dios; jec'ula' u'anom wo'ora.

<sup>30</sup> Pero ¿sa' ri cubi'ij Ruch'a'tem ri Dios tz'ibital canok? Jewa' cubi'ij:

E chesaj bi la rixok aj chac pa ja junam ruc' ri ralab. Ma che ri ralab wi'xok na caya'i' ta ri takal che cuc'ul ri ralab ri rixokil ri rajaw ja

*Gn. 21:10*

cacha'.

**31** E uwari'che hermanos, ri'oj na oj ta ralc'o'al rixok aj chac pa ja, ma oj ralc'o'al ri rixokil ri rajaw ja.

## 5

*Ri Cristo ojresam chi chuxé' ri takanic que raj judi'ab*

**1** E chuk'ubej ib alak che ri colobetajic xya'i' chike ruma ri Cristo echiri' xojresaj lo chuxé' ri takanic que raj judi'ab; maya tanchi c'u ib alak chuxé' ruc'ayewal wa' wa takanic.

**2** Chinta na pe alak. Ri'in Pablo, cambi'ij che alak: We caya ib alak che ucojic ri retalil re circuncisión cha' cac'oja' alak jusuc' chwach ri Dios, ri' na jinta uchac ri Cristo che alak.

**3** Cuaj cambi'ij tanchi wa': We junta achi cucoj ri retalil re circuncisión,\* ri' chirajawaxic che e cu'an ronoje ri takanic que raj judi'ab.

**4** Ec'u ralak, ri cach'ob alak e cu'an alak jusuc' chwach ri Dios ruma ri catakej alak wa takanic, ri' che ri Cristo xesaj wi ib alak y e xya can alak ri unimal rutzil uc'u'x ri Dios.

**5** No'j ri'oj, ruma ri Ruxlabixel ri Dios pa kanim'a', koye'em ri k'ij echiri' ri Dios cojuc'ulu ma oj chi jusuc' chwach ruma ri cubulibal kac'u'x ruc' ri Cristo.

**6** Yey we oj re ri Kanimajawal Jesucristo, na jinta chi que'elawi we cakacoj ri retalil re circuncisión o we na cakacoj taj. Ma ri lic chirajawaxic e ri

\* **5:3** Wa' e cach'a't paquiwi ri na e ta aj judi'ab, ri xquicoj ri retalil re circuncisión ma e xquich'obo ruc' wa' caquirik ri colobetajic.

cubulibal kac'u'x ruc' ri Cristo, yej wa' e cakac'ut  
ruma ri rutzil kac'u'x.

<sup>7</sup> Ri binic silabic alak ruc' ri Cristo xjek lo alak  
chi utz. ¿China xk'aten e alak cha' na cabin ta chi  
alak chupa ri K'ijsak?

<sup>8</sup> Ri Dios, ri xusiq'uij alak, na e ta xuc'ut wa' che  
alak.

<sup>9</sup> Masach chic'u'x alak wa': «Echiri' que'ec jubik'  
levadura chupa ri k'or re pam, wa' cusipowirisaj  
upa ronoje.» Wa' e que'elok: E junok na sakil ta  
runa'oj, cusachisaj ri quina'oj ri jujun chic.

<sup>10</sup> Ruma c'u kaya'om kib ralak y ri'in puk'ab ri  
Cristo, e lic cubul nuc'u'x na jintu juna chic na'oj  
alak puwi wa' chwa ri canch'ob ri'in. Yey we c'o  
junok cusachisaj na'oj alak, c'o chi ri' ri k'atbal tzij  
re ri Dios puwi', xa tob chinok.

<sup>11</sup> Ec'u ri'in hermanos, we ta e la' cambi'ij chirajawaxic cacoj ri retaliil re circuncisión che junok  
cha' cacolobetajic, ri' raj judi'ab na quech'o'jin ta  
chi wuc' y na tzel tane caquita ri tzijonic can'an  
puwi rucamic ri Kanimajawal Jesucristo chwa ri  
cruz. No'j na je ta la' u'anom.

<sup>12</sup> Ec'u chique ri caquisachisaj na'oj alak, ¡ta ne  
asu quik'ata bi ri culewal!

<sup>13</sup> Ma ralak hermanos, xsiq'uij alak cha' na  
cac'oji' ta alak chuxe' ri takanic que raj judi'ab;  
xew c'u matz'il'a' ri binic silabic alak ruc' tak ri  
rayibal re ri ti'jil alak. E nimaj ib alak chiwach  
alak ruc' rutzil c'u'xaj.

<sup>14</sup> Ma ronoje ri takanic re ri Moisés catz'akat  
uwach ruc' wa ch'a'tem: «C'ax chana'a rawatz-  
achak'jela' pacha' ri c'ax cana' awib ri'at»<sup>◊</sup> cacha'.

---

<sup>◊</sup> 5:14 Lv. 19:18

**15** No'j we ralak capurij ib alak y catij ne ib alak chiwach alak, chajij c'u ib alak ri' ma c'axtaj asu casach ne wach alak chiwach alak.

*Tak ri rayibal na utz ta uwach que ri ticawex*

**16** Cambi'ij c'u wa' che alak: E takej alak janipa ri caraj ri Ruxlabixel ri Dios che alak cha' jela' na caya ta ib alak che tak ri rayibal re ri ti'jil alak.

**17** Ma e rurayibal ri ti'jil alak na cuc'ulaj ta rib ruc' ri caraj ri Ruxlabixel ri Dios, yey e ri Ruxlabixel ri Dios na cuc'ulaj ta rib ruc' rurayibal ri ti'jil alak. Quicabichal c'u ri' quech'o'jin chiqui-wach; rumá c'u la', ri ti'jil alak cuk'atej ri utz ca'aj alak ca'an alak.

**18** No'j we e ri Ruxlabixel ri Dios ri cac'amaw wach alak, ri' na jinta alak chuxe' ri takanic re ri Tzij Pixab.<sup>†</sup>

**19** Lic cak'alajin uwach tak ri na utz taj caqui'an ri winak ri caquitakej tak ri rayibal re ri quiti'jil. Rique e quemacun chirij ri c'ulaniquil, caquetz'abej uwa quik'ij cuc' jujun chic na quic'ulel taj, caqui'an ri ch'ulilaj mac y caquimaj uwach tak ri rayibal re ri quiti'jil,

**20** caquiloc'nimaj uk'ij tiox, caqui'an itz, tzel quequil jujun chic, e aj ch'a'oj, c'ax quic'u'x chiquij jujun chic; e aj oyowal, e aj chapanel che ch'a'oj, e aj jachal quipa jujun chic, e aj c'utunel re tak na'oj na utz taj<sup>‡</sup>

---

<sup>†</sup> **5:18** Wa' na e ta que'elawi utz cojmacunic. E que'elawi ri Ruxlabixel ri Dios cojuto'o cha' caka'an ronoje ri caraj ri Dios. Ro. 6:15    <sup>‡</sup> **5:20** "E aj c'utunel re tak na'oj na utz taj": Pa ri ch'a'tem griego wa' también que'elawi "ri xew caquimol quib cuc' ri junam quina'oj cuc' rique".

<sup>21</sup> tzel caquil jun chic ruma caquirayij ri c'o ruc', e camisanel, e k'aba'relab, caquimol quib re caqui'an ch'ulilaj mac y caqui'an jujun chic mac pacha' tak wa'. Cambi'ij c'u jumul chic che alak: Conoje wa' na jinta que cuc' ri ya'tal chique queboc pa rutakanic ri Dios.

*Ri quibinic quisilabic ri quitakem janipa ri caraj ri Ruxlabixel ri Dios*

<sup>22</sup> No'j rujik'obalil ri Ruxlabixel ri Dios ruc' junok e wa': pa ranima' c'o rutzil c'u'xaj, c'o qui'cotemal y c'o utzil chomal; c'o unimal uc'u'x, utz uc'u'x, c'o relej uc'u'x; ri jujun chic cacubi' quic'u'x ruc', ma janipa ri cubi'ij, e cu'ana';

<sup>23</sup> na cu'an ta nim che rib y cuch'ij uchuk'ab tak ri rayibal re ruti'jil. We jec'uri'la' u'anom junok, na cajawax tane ri' c'o junok capixaban re cha' cu'an ri utz.

<sup>24</sup> Janipa ri e re ri Kanimajawal Jesucristo, na caquitakej ta chi§ ri rayibal re ri quiti'jil.

<sup>25</sup> We ri Ruxlabixel ri Dios uya'om ri c'ac' kac'aslemal, kaya'a c'u ri kabinic kasilabic puk'ab Rire.

<sup>26</sup> Makatzucuj ri yacbal kak'ij, makapetisaj koy-owal chikawach y matzel mekil jujun chic ruma cakarayij ri c'o cuc'!

## 6

### *Kato'o kib chikawach*

<sup>1</sup> Hermanos, we xna'bej alak c'o junok tzakinak pa mac, e ralak ri c'amom wach alak ruma ri Ruxlabixel ri Dios, to'o alak cha' cayactajic. Yey

---

§ **5:24** “Na caquitakej ta chi”: Pa ri ch'a'tem griego cubi'ij “quicamisam chwa cruz”.

chajij ib alak ma c'axtaj catzak ralak chupa wa' wa xu'an rire.

<sup>2</sup> To'o ib alak chiwach alak we c'o junok che alak c'o pa c'axc'obic, ma jec'uri'la' catajin alak che u'anic ri tzij xuc'ut can ri Cristo.

<sup>3</sup> Ma we c'o junok cuch'obo lic c'o uwach ruma ri cu'ano yey na e ta c'u u'anom, ri' utuquel cusoc rib.

<sup>4</sup> E uwari'che chirajawasic wi chikajujunal cakach'ob chi utz puwi ri ka'anom. Y we utz ri ka'anom chwach ri Dios, chojqui'cot c'u ri', pero maka'an c'u nim che kib xa ruma ka'anom más chiquiwa ri jujun chic.

<sup>5</sup> Ma ri chirajawasic wi e chikajujunal cakac'am bi ri c'o chikakul caka'ano.

<sup>6</sup> We c'o junok cuc'ut Rutzij Upixab ri Dios che alak, chirajawasic wi cato' alak rire ruc' ri bitak e alak.

<sup>7</sup> Masocosa' ib alak: Na jintu junok casocow re ri Dios. E chirij ri cutic junok, e jela' ri cumolo.

<sup>8</sup> Ma we junok e cuya rib che tak ri rayibal re ruti'jil, ri' e cuc'am lo ri camic puwi'. No'j we junok e cuya rib che u'anic ri caraj ri Ruxlabixel ri Dios, ri' che ri Ruxlabixel cuc'ul ri c'aslemal na jintu utakexic.

<sup>9</sup> Mojcos che u'anic ri utz y makok'otaj ne u'anic wa', ma copon na ruk'ijol que'kila uwach ru-jik'obalil ri ka'anom.

<sup>10</sup> E uwari'che, we c'o pakak'ab caka'an ri utz, e ka'ana c'u ri' wa' chique conoje, y más e ka'ana ri' chique conoje ri quicojom rubi' ri Cristo.

*Q'uisbal uch'a'tem ri Pablo che riglesia c'o Galacia*

<sup>11</sup> Chilape alak, ruc' nimak tak letras quintz'ibán pan che alak.

<sup>12</sup> Ri jujun caquibi'ij che alak e lic chirajawasic wi cacoj alak ri retalil re circuncisión, caqui'an wa' xa e cha' na caquijal ta uchi' chiquiwach jujun chic y cha' na cape ta c'ax paquiwi' ruma caquitzijoj rucamic ri Cristo chwa ri cruz.

<sup>13</sup> Ma ri jujun caquimin alak chupa che uco-jic ri retalil re circuncisión, rique na caqui'an tane ronoje ri Tzij Pixab; xew cacaj caquitac'aba' quik'ij ruma xcoj alak quitzij.

<sup>14</sup> No'j ri'in na cuaj ta c'ana cantac'aba' nuk'ij, xew lic canyac uk'ij ri Kanimajawal Jesucristo ruma ri xu'an Rire chwa ri cruz. Ruma c'u ri', na cacha ta chi nuc'u'x che tak ri xa re ruwachulew; ronoje wa' e pacha' caminak chi chinuwach ri'in; yej ri'in e pacha' in chi caminak chwach tak ri xa re ruwachulew.

<sup>15</sup> Ma we oj re ri Kanimajawal Jesucristo, na jintu chi que'elawi we cakacoj ri retalil re circuncisión o we na cakacoj taj; ma ri lic caraj Rire, e cu'an c'ac' ri kabinic kasilabic.

<sup>16</sup> Onoje c'u ralak ri takem alak wa' wa c'utunic puwi ri c'ac' kabinic, c'ulu alak ri utzil chomal y ri rutzil uc'u'x ri Dios, junam cuc' rutinamit Israel, ri pakatzij wi e re Rire.

<sup>17</sup> Chwi c'u wo'ora, na cuaj taj c'o junta latz'anel chwe puwi ri nuc'utunic, ma che ri nucuerpo k'alaj tak ri c'utubal re ri c'axc'obic xinic'ow wi ruma in jun aj chac re ri Kanimajawal Jesucristo.

<sup>18</sup> Hermanos, c'ola c'u pa anima' alak ri unimal rutzil uc'u'x ri Kanimajawal Jesucristo. Amén.

**Ri utzilaj tzij re ri kanimajawal Jesucristo**

**New Testament in Achi Rabinal; acr (GT:acrT:Achi)**

copyright © 2009 Wycliffe Bible Translators, Inc.

Language: Achi

Dialect: Rabinal

Translation by: Wycliffe Bible Translators, Inc.

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Achi

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

PDF generated using Haiola and XeLaTeX on 18 Apr 2025 from source files  
dated 31 Aug 2023  
a2970064-f021-521c-ab99-6401141f84e7